


# ЗАХРИ КОТИЛ



## ДОМИГА



## ИЛИНМАНГ!

Бугунги кунда жаҳон ҳамжамиятини жиддий ташвишга solaётган муаммолардан бири гиёхвандлик эканлиги ҳеч кимга сир эмас. Ушбу иллат вабо каби оғир, тарқалиши тез, аммо чекиниши, барҳам топиши жуда мураккаб бўлган оғатдир. У инсон соғлиғи ва хавфсизлигига жиддий таҳдид солиши билан бирга муайян ҳудудда қриминоген вазиятга, жамиятнинг иқтисодий-маданий негизига салбий таъсир кўрсатмоқда.

Жаҳон соғлиқни сақлаш ташкилотининг баёнотида таъкидланишича, инсоният саломатлигининг бугуни ва келажаги учун энг жиддий глобал таҳдид гиёхвандликдир. Уюшган жиноятчиликнинг ривожланиши, аҳоли ўртасида ОИТС ва бошқа юқумли касалликларнинг тарқалиши айнан заҳри қотилга ружу қўйиш туфайли юзага келаётган, инсоннинг имкониятларига путур етказувчи оғир асорат бўлиб келмоқда. Наркотик моддаларни қонунга хилоф равишда сотиш билан шуғулланганлар жиноий жавобгарликка тортилиши қонунда белгиланган. Гиёхвандлик оиласларнинг барбод бўлиши, фарзандларининг майб-мажруҳ туғилишига, бефарқлик, беҳаёлик сингари оқибатларга олиб келади. Шу боис ушбу муаммо ўтган аср ўрталарида минтақавий ва муайян давлатнинг ички муаммосидан глобал муаммога айланди. Унга қарши курашиш бутун инсоният олди-

да турган муҳим вазифалардан биридир.

Бундай ажал уруғининг ер юзи бўйлаб шиддат билан тарқалаётгани келгуси авлодлар ҳақида қайғурадиган ҳар бир миллатни ташвишга solaётгани шубҳасиз. Маълумотларга қараганда, ҳозирги кунда гиёхвандлик моддалари савдоси билан ноқонуний шуғулланадиган жиноий уюшмаларнинг бундай фаолият туридан оладиган даромади ҳатто қурол-яроғ савдоси даромади билан тенглашмоқда. Ер юзида наркотикларнинг ноқонунний савдосидан келадиган молиявий маблағ жаҳон аҳолисининг озиқ-овқат, турар-жой, кийим-кечак, таълим ва тиббиёт хизматига сарфланаётган харажатлардан анча ошиб кетар экан. Аммо бу иллатнинг ижтимоий хавфи фақат жамиятнинг моддий йўқотиши билан чекланса кошкийди. Сурункали гиёхвандликка чалингандарнинг аксарияти 30 ёшгача ҳам яшамайди.

Бу иллат домига илинган инсонлар оғуни қўлга киритиш йўлида қотиллик, босқинчилик, талончилик, ўғрилик, фирибгарлик ва бошқа жиноятларни содир этишгача бормоқда. Ҳатто айримлар оғу учун ўз отонасига қўл кўтаришдан ҳам тап тортмайди. Яна такрор айтамиз – унинг оқибатида неча минглаб инсонларнинг ёстиғи қурияпти, қўплаб оиласларда ногирон фарзандлар туғиляпти. Бу – миллат илдизига

болта уриш, Ватан келажагига путур етказишдан бошқа нарса эмас.

Шунинг учун мазкур иллатга қарши курашиш нафақат ҳуқуқ-тартибот идоралари ва тиббиёт ходимлари, балки кенг жамоатчиликнинг вазифаси ҳисобланади. Ана шу жиҳат эътиборга олиниб, мамлакатимизда наркотик моддаларининг ноқонунний айланиши ва гиёхвандликка қарши муросасиз кураш олиб борилмоқда. Унинг ҳуқуқий асоси Ўзбекистон Республикасининг «Гиёхвандлик воситалари ва психотроп моддалар тўғрисида»ги Қонуни, Ўзбекистон Республикасининг Жиноят, Маъмурий жавобгарлик тўғрисидаги кодекслари ва бошқа норматив-ҳуқуқий ҳужжатларда ўз аксини топган.

Оғуфурушлар ёш авлод тарбиясига салбий таъсир кўрсатиб, келажагини барбод қилишга уринаётгани ҳар биримиздан ўта ҳушёрликни талаб қилади. Бу оғатнинг олдини олиш учун, энг аввало, таълим муассасалари, корхона ва ташкилотлар ҳамда маҳаллаларда тарғибот-ташвиқот ишларини кучайтиришимиз лозим.

Ушбу иллатни таг-томири билан қуритишга нафақат ҳуқуқ-тартибот идоралари ходимлари, ота-оналар, балки ҳар биримиз масъул эканлигимизни бир дақиқа ҳам уннутишга ҳаққимиз йўқ. Келинг, биргаликда шу йўлда ҳамжиҳат бўлиб курашайлик.

**Аслиддин НАСИМОВ,  
лейтенант.**